



N° 6477
Reçue le 13.07.2022
Déclarée recevable
Président de la Chambre des Députés
(s.) Fernand Etgen
Luxembourg, le 13.07.2022

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 13/07/2022

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Bildung & Interieur weiderzeleeden.

«Wir werden nicht alle in den Maisons Relais aufnehmen können», esou titelt L'essentiel een Artikel vum 2te Juli. D'Regierung huet jo decidéiert, dass dës Zort Betreuungsstrukturen an Zukunft solle gratis ginn. Dës Decisioun wäert mam Gesetzesprojet 7986, deen den 12te Juli an der Chamber gestëmmt gouf, realiséiert ginn.

Allerdéngs, an esou gouf et an der Chamberssitzung gesot, kënnen net all Familljen Usproch vun dësem gratis Service huelen, well et, jee no Gemeng, an de Maisons Relais'en keng Platze méi gëtt. A verschiddene Gemenge si 500 Kanner op de Waardelëschte fir ugeholl kënnen ze ginn. Dës Situatioun blockéiert d'Elterendeeler, déi fir d'Betreiung vun hire Kanner selwer opkomme **mussen**. Gläichzäiteg ass d'Gläichheet vun de Chancë fir d'Kanner am aktuelle Kontext net garantéiert, well de Prinzip gëllt: wer zuerst kommt, malt zuerst. Schliisslech huet d'ëffentlech Petitioun n°2061 net fir näischt als Titel gehat: *"Ënnerstëtzung fir d'Elteren deenen hier Kanner NET an eng Maison relais ginn"*.

An deem Zesammenhang wéilt ech de Ministeren dës Froe stellen:

1. De Minister hat op d'Fro n°6162 geäntwert, dass de Staat keen Abléck op d'Waardelëschte vun de Maisons Relais hätt, well des vun den eenzele Gestionnaire gefouert ginn. Gläichzäiteg finanzéiert de Staat dës Strukturen awer all Joer mat Milliounebeträg. Wéi wëll d'Regierung den Impakt vun hirer Politik verstoen, wann se mol net d'Demande fir dës politesch Moosnam identifizéiere kann?

Am Fall, wou een an der Tëschenzäit awer Donnéeën zu der Waardelëschte sollt hunn: Wéi grouss sinn aktuell d'Waardelëschten, opgelëscht no Gemeng a wéi vill Maisons Relais'en feelen aktuell, opgelëscht no Gemeng?

2. Gedenkt d'Regierung iergendeppes um nationale Plang z'ënnerhuelen, fir dass d'Kanner am ganze Land Usproch op eng Plaz an der Maison Relais kënnen hunn onofhängeg dovunner, a wéi enger Gemeng se wunnen?



www.piraten.lu

3. Wéi fënnt d'Regierung d'Iddi, dass Elteren, déi ee schrëftleche Refus krute fir eng Plaz an enger Maison Relais, op mannst d'Suen vum d'Mëttegiessen, dat jo hei gratis ass, vum Staat oder der Gemeng ausbezueelt géife kréien?

Mat déiwem Respekt,



GOERGEN Marc

Député





Gemeinsam Äntwert vum Minister fir Educatioun, Kanner an Jugend, Claude Meisch, an der Inneministesch, Taina Bofferding, op d'parlamentaresch Fro Nr. 6477 vum honorabelen Deputéierte Marc Goergen

Esou wéi d'Kand an d'ëffentlech Schoul geet, ouni dofir mussen ze bezuelen, soll och d'Kand ab dem 12. September 2022 d'Méiglechkeet kréien, fir e fräien Accès zu de Bildungs- a Betreuungsstrukturen ze hunn. Gutt Bildung an Zukunftschancë fir d'Kanner solle keng Fro vum Portemonnaie vun den Eltere sinn. Dëst ass eng grondsätzlech Fro, mat där d'Regierung de Wäert vun der non-formaler Bildung nach eng Kéier ënnersträicht.

Et ass net ugeduecht, fir den Eltere vu Kanner, déi net vun dëser Offer profitéieren, eng Kompensatioun zoukommen ze loossen.

Mir erlaben eis doriwwer eraus, dem honorabelen Deputéierten nach eng Kéier grondsätzlech d'Attributiounen an de Rôle vum Staat am Beräich vun der Kannerbetreung an Erënnerung ze ruffen.

Den Educatiounsministère ass engersäits fir de gesetzleche Kader an d'Qualitéitssécherung an -entwécklung am Beräich vun de Bildungs- a Betreuungsstrukturen zoustänneg. Anerersäits dréit de Staat zum Finanzement vum Bau vun de Gebaier an der Offer bäi.

D'Entwécklung vun der Offer läit an der Hand vun de Gemengen, déi zesumme mat konventionéierten Acteuren eng Offer opbaue kënnen an, an der Hand vu privat rechtlechen Acteuren.

Den non-formale Bildungsberäich besteet deemno net nëmmen aus Maison-relais, d.h. Betreuungs- a Bildungsstrukture fir Schoulkanner, déi ënnert der Gemeng als lokalen Entscheidungsträger opgebaut ginn, mee dozou zielen och aktuell eng 111 Foyers de jour, déi vu privaten Träger gefouert ginn, an 387 Dageselteren, déi och Schoulkanner kënnen encadréieren. A verschidde Gemenge maachen d'Foyeren an d'Dageseltere bis zu 30% vun der non-formaler Bildungsoffer fir d'Schoulkanner aus.

An de leschte Jore si vill Efforten ënnerholl ginn, fir der grousser Demande vun den Elteren no enger Betreuungsplaz fir hir Kanner nozekommen. Zanter der Aféierung vum Chèque-service accueil (CSA) am Joer 2009 huet de Secteur insgesamt eng Progressioun vun ongeféier 400% um Niveau vun de Plazen ze verzechnen (cf. Rapport d'activité MENJE 2021). Aktuell sinn ongeféier 35.000 Kanner, déi der Schoufflicht ënnerleien, an enger non-formaler Bildungsstruktur ageschriwwen (Juni 2022).

Mat Ausnam vum Pandemiejoer 2020 hält d'Zuel vun de Beneficiairë vum CSA am Schnëtt nach ëmmer pro Joer ëm 4% zou, iwwerdeems d'Zuel vun de Plazen, déi de Kanner um nationale Plang zur Verfügung gestallt ginn, am Schnëtt pro Joer ëm 3% klëmmt.

An all Gemeng gëtt et an der Tëschenzäit op d'mannst eng Maison relais, d.h. eng konventionéiert Struktur, wou d'Schoulkanner encadréiert ginn. Net all Gemeng huet privat Foyers de jour an Dageselteren op hirem Territoire. Et ass gewosst, wou wéi eng non-formal Bildungsstrukturen ugesidelt sinn. Bekannt sinn och hir Kapazitéit an d'Zuel vun de Kanner, déi am Laf vum Mount betreit gi sinn. Vu datt eng Plaz duerch méi Kanner ka besat ginn, seet den Taux d'occupation, dee méi héich ass wéi 100%, näischt direkt aus iwwert de Bedarf un zousätzleche Plazen. Et kënnen deemno Strukture ginn, déi en Taux d'occupation vun 100% hunn an awer nach fräi Plaze hunn, well eng Plaz

vun zwee oder méi Kanner besat ka ginn. Par contre kënne mir doraus awer sécher schléissen, datt, wann eng Struktur méi Plazen huet wéi Kanner, déi betreit ginn (den Taux d'occupation läit ënner 100 %), se sécher nach fräi Plazen huet. Laut dëser Berechnung hu mindestens 67% vun de konventionéierte Strukturen fir d'Schoulkanner nach fräi Plazen. Um Niveau vun de private Foyers de jour sinn et mindestens 46%, déi laut eise Berechnungen nach iwwer fräi Plaze verfügen (Juni 2022).

Et ass deemno net esou, wéi wann ee vun enger genereller Penurie vu Betreuungsplazen zu Lëtzebuerg schwätze kéint.

D'Erklärungen, firwat an deene Gemengen, wou d'Auslaaschtung vun de Betreuungsstrukturen un hir Limitte stéisst, net z.B. privat rechtlech Strukturen d'Offer iwwerhuelen, si villfälteg an u lokal Gegebenheete geknäppt. Ee vun de Grënn, déi invoquéiert ginn, si feelend Surfacen, fir an urbane Raim kënne sou Bildungs- a Betreuungsstrukturen z'entwéckelen.

Staark lokal Croissancë vun der Populatioun an enger Gemeng sinn en anere Grond, firwat d'Kapazitéite vun de Bildungs- a Betreuungsstrukturen un hir Limitte stoussen. An dësem Fall sinn d'Gemengen dacks an engem temporären Enkpass bis zur Finaliséierung vun neie Betreuungsstrukturen.

D'Verhalen an d'Liewensorganisatioun vun den Elteren ass och net an all Gemeng identesch a variéiert vun enger Regioun zur anerer. Et gëtt Gemengen (z.B. Südgemengen), déi um Niveau vun der Planung eng Offer viséieren, déi 100% vun de Schoulkanner ofdeckt. Aner Gemengen, besonnesch déi am ländleche Raum, kommen am Moment duer mat enger Offer, déi manner wéi 100% vun de Schoulkanner ofdeckt, sief et well et aner privat Bedreiwer vu Betreuungs- a Bildungsstrukturen an der Gemeng gëtt, sief et well de Bedarf u Plazen an der Gemeng net doriwwer erausgeet.

Wat d'Planung vun den noutwennige Betreuungsplazen um lokale Plang ubelaangt, do spillt d'Gemeng eng zentral Roll. Dës Planung kann och just iwwert d'Gemeng assuréiert ginn, well bei der Gemeng all déi Informatiounen (betreffend d'Zuel vun de Kanner, d'Zesummenaarbecht mat externe Bedreier, de Wuesstem vun der Gemeng an de Bedarf u Betreierung vun der lokaler Bevëlkerung) zesummelafen, déi ee brauch, fir de Bedarf un zousätzleche Plazen iwwert déi kommend Joren ze bestëmmen.

All dës Grënn schwätzen dofir, fir an der Planung an Entwécklung vun de Betreierungsstrukturen um besteeënde Partenariat tëscht Staat a Gemenge festzehalen, bei där d'Gestioun vun de Waardelëschten op der Säit vun de Gemengen an net beim Staat läit.

Lëtzebuerg, den 20. September 2022

De Minister fir Educatioun,
Kanner a Jugend

(s.) Claude MEISCH